

‘আস্তিকতা বনাম নাস্তিকতা’র প্রত্যুত্তরে

অভিজিৎ রায়

জনাব মেজবাহউদ্দিন জওহেরের আস্তিকতা এবং নাস্তিকতা নিয়ে অত্যন্ত সুলিখিত লেখাটি পড়বার পর থেকেই এ নিয়ে কিছু লিখবার তাগিত অনুভব করছি। প্রবন্ধটির গঠন শৈলী এবং ভাষাবিন্যাসের জন্য কেবল নয়, প্রতিপক্ষের চিন্তাধারার প্রতি তাঁর সন্মানবোধ, বিপরীত মতগুলোকেও যথেষ্ট গুরুত্বের সাথে নেওয়া, যাচাই করা, সেগুলো নিয়ে চিন্তা করা এবং বুদ্ধিমত্তার সাথে খন্ডন করার চেষ্টা করা সব কিছুর ব্যাপারেই তার লেখাটি আমাদের জন্য একটি আদর্শ হতে পারে। বিতর্ক করতে এসে পারস্পরিক শ্রদ্ধাবোধের ব্যাপারগুলো ক্রমশঃ বোধ হয় আমরা হারিয়ে ফেলতে চলেছি। কুৎসিৎ কুৎসিৎ গালাগালি দিয়ে প্রতিপক্ষকে ঘায়েল করার মধ্যেই যেন আজকের কিছু লেখকদের পরিতৃপ্তি। কোন যুক্তিনিষ্ঠ সমালোচনা করলেও ‘অমুক ব্যাশার’, ‘তমুক ব্যাশার’ বলে লেখকের মুখ বন্ধ করার প্রচেষ্টা, এক লেখকের সাথে আরেক লেখককে জুড়ে দিয়ে মিথ্যা প্রোফাইল বানিয়ে ‘সততার’ দাবীদারদের ঘোল খাওয়ানোর অপচেষ্টার এই ‘ঘোর কলিকালে’ জনাব জওহেরের প্রবন্ধটি নিঃসন্দেহে একটি ব্যতিক্রমধর্মী সংযোজন হিসেবে বিবেচিত হবে।

জওহেরের সাহেবের প্রবন্ধটিকে খন্ডন করবার জন্য নয়, মূলতঃ নিরপেক্ষভাবে কিছু তথ্য তুলে ধরতেই আমার আজকের এই লেখা। হয়ত ব্যাপারটিকে ‘অর্থহীন বিতর্কের সূচনা’ বলে মনে হতে পারে, কিংবা মনে হতে পারে অযথা কালক্ষেপণ, কিন্তু আমার মনে হয় আমাদের এই উন্মুক্ত আলোচনায় আমরা নিজেরা তো বটেই, উপকৃত হবে ভিন্নমত-মুক্তমনার অগনিত সাধারণ পাঠকেরাও। এটি প্রয়োজনীয়, কারণ, রাষ্ট্রীয় পক্ষপাতদুষ্ট আইন-কানূনের সীমাবদ্ধতায় এ ধরনের আলোচনা দেশে কখনই সম্ভব হত না; আমরা দেখেছি প্রচার মাধ্যম এবং সংবাদ পত্র গুলোও ‘তীব্রদারদের তল্পিবাহক’ হিসেবে সবসময়ই থেকে গিয়েছে, যুক্তি-তর্কের গঠনমূলক পরিবেশ সৃষ্টি করে মুক্ত-মনের বিকাশে কখনই উদ্যোগ নেয় নি; ধর্মের রাজনীতি আর ধর্মানুভূতিটাই যেন তাদের কাছে মূখ্য, ফলে জ্ঞান-বিজ্ঞান, যুক্তি—বুদ্ধির চর্চা পদে পদে হয়েছে বাঁধাগ্রস্ত, কখনও বা নির্মমভাবে পদদলিত। ইন্টারনেট আসার ফলে এ শ্বাসরুদ্ধকর অবস্থা থেকে আমরা পরিত্রাণ পেয়েছি অনেকটাই। এখানে আইনের যাঁতাকলে পড়ে তথ্যের আদান-প্রদান একপেশে ভাবে আর বাঁধাগ্রস্ত হয় না; ফলে দুই পক্ষই নির্ভয়ে নিজেদের মতামত প্রকাশ করতে পারে- হোক না যতই তা ধর্মবিরুদ্ধ, প্রথাবিরুদ্ধ অথবা দেশপ্রেমবিবর্জিত; আর নিরপেক্ষ পাঠকেরা দুপক্ষের বক্তব্য থেকে সহজেই সত্যের নির্যাসটুকু আন্সাদন করতে পারবেন।

জওহের সাহেব নাস্তিকতার সংজ্ঞা যে ভাবে দিয়েছেন, তার সাথে আমি একদমই একমত নই। তিনি রবীন্দ্রনাথের একটি উপন্যাসের (সম্ভবত গোরা) একটি চরিত্রের উদ্ধৃতি দিয়ে বলতে চেয়েছেন নাস্তিকরাও এক অর্থে বিশ্বাসী। তারা ‘না-ঈশ্বরে’ বিশ্বাসী। জওহের সাহেব শুধু নন, আমি দেখেছি অনেকেই বুঝে হোক, না বুঝে হোক, এই ব্যাপারটি মাঝে মাঝে এভাবেই আউরে দেন যে, আস্তিক্যবাদের মত নাস্তিক্যবাদও একধরনের বিশ্বাস। আস্তিকরা যেমন ‘ঈশ্বর আছে’ এই মতবাদে বিশ্বাস করে, তেমন নাস্তিকরা বিশ্বাস করে ‘ঈশ্বর নেই’ - এই মতবাদে। দুটোই নাস্তিক বিশ্বাস। নাস্তিকদের এভাবে সংজ্ঞায়ন সঠিক কি ভুল, তা বুঝবার আগে ‘নাস্তিক’ শব্দটির বুৎপত্তিগত অর্থটি আমাদের জানা প্রয়োজন। ‘নাস্তিক’ শব্দটি ভা-লে দাঁড়ায়, নাস্তিক + কন বা নাস্তিক+ক। ‘নাস্তি’ শব্দের অর্থ হল নাই, অবিদ্যমান। ‘নাস্তি’ শব্দটি মূল সংস্কৃত হতে বাংলায় এসে ‘ক’ বা ‘কন’ প্রত্যয় যোগে নাস্তিক হয়েছে যা তৎসম শব্দ হিসেবে গৃহীত। ন আস্তিক = নাস্তিক - যা ন এও তৎপুরুষ সমাসে সিদ্ধ এবং আস্তিকের বিপরীত শব্দ। আরো সহজ করে বাংলায় বললে বলা যায়, না + আস্তিক = নাস্তিক। খুবই পরিষ্কার যে, সঙ্গত কারণেই আস্তিকের আগে ‘না’ প্রত্যয় যোগ করে নাস্তিক শব্দটি তৈরী করা হয়েছে। আস্তিকরা যে ঈশ্বর/আল্লাহ/খোদা ইত্যাদি পরম সত্তায় বিশ্বাস করে এ তো সবারই জানা। কাজেই নাস্তিক হচ্ছে তারাই, যারা এই ধরনের বিশ্বাস হতে মুক্ত। তাই সংজ্ঞানুযায়ী নাস্তিকতা কোন বিশ্বাস নয়, বরং ‘বিশ্বাস হতে মুক্তি’ বা ‘বিশ্বাসহীনতা’। ইংরেজীতে নাস্তিকতার প্রতিশব্দ হচ্ছে ‘atheist’। সেখানেও আমরা দেখছি theist শব্দটির আগে ‘a-’ প্রিফিক্সটি জুড়ে দিয়ে atheist শব্দটি তৈরী করা হয়েছে। অ্যাথিজমের উপর বহুল প্রচারিত গবেষণাধর্মী একটি ওয়েব সাইটে শব্দটির সংজ্ঞায়ন করা হয়েছে এভাবে -

Atheism is characterized by an absence of belief in the existence of gods. This absence of belief generally comes about either through deliberate choice, or from an inherent inability to believe religious teachings which seem literally incredible. It is not a lack of belief born out of simple ignorance of religious teachings.

সহজেই অনুমেয় যে, ‘absence of belief’ শব্দমালা চয়ন করা হয়েছে ‘বিশ্বাস হীনতা’কে তুলে ধরতেই, উলটোটি বোঝাতে নয়। Gordon Stein তাঁর বিখ্যাত ‘An Anthology of Atheism and Rationalism’ বইয়ে অ্যাথিজমের সংজ্ঞায়ন করতে গিয়ে বলেন,

When we examine the components of the word 'atheism,' we can see this distinction more clearly. The word is made up of 'a-' and '-theism.' Theism, we will all agree, is a belief in a God or gods. The prefix 'a-' can mean 'not' (or 'no') or 'without.' If it means 'not,' then we have as an atheist someone who is not a

theist (i.e., someone who does not have a belief in a God or gods). If it means 'without,' then an atheist is someone without theism, or without a belief in God. (Atheism and Rationalism, p. 3. Prometheus, 1980)

আমরা যদি atheist শব্দটির আরো গভীরে যাই তবে দেখব যে, এটি আসলে উদ্ভূত হয়েছে গ্রীক শব্দ 'a' এবং 'theos' হতে। গ্রীক ভাষায় 'theos' বলতে বোঝায় ঈশ্বরকে, আর a বলতে বোঝায় অবিশ্বাস বা বিশ্বাসহীনতাকে। সেজন্যই Michael Martin, তাঁর "Atheism: A Philosophical Justification" বইয়ে বলেন, 'According to its Greek roots, then, atheism is a negative view, characterized by the absence of belief in God.' (*"Atheism: A Philosophical Justification"*, p. 463., Temple University Press, 1990)

আসলে নাস্তিকতাকে 'না-ঈশ্বরে বিশ্বাসের' খাঁচায় পুরে বিশ্বাসীর দলে ভিরানোর ব্যাপারটি খুবই অবিবেচনাপ্রসূত। ব্যাপারটাকে আরেকটু পরিস্কার করা যাক। ধরা যাক, এক মুক্ত-মনা যুক্তিবাদী ব্যক্তি ভুতে বিশ্বাস করেন না। তবে কি সেজন্য তিনি 'না-ভুতে' বিশ্বাসী হয়ে গেলেন? জওহের সাহেবের যুক্তি অনুযায়ী তাই হবার কথা। এভাবে দেখলে, প্রতিটি অপ-বিশ্বাস বিরোধিতাই তাহলে উলটোভাবে 'বিশ্বাস' বলে চালিয়ে দেওয়া যায়, তা সে ভুতই হোক, পঞ্জিরাজ ঘোড়াই হোক, অথবা ঘোড়ার ডিমই হোক। যিনি পঞ্জিরাজ ঘোড়া বা চাঁদের চড়কা-বুড়ীর অস্তিত্বে বিশ্বাস করেন না, তিনি আসলে তাঁর সংশয় এবং অবিশ্বাস থেকেই তা করেন না, তার 'না-বিশ্বাসে' বিশ্বাসী হবার কারণে নয়। যদি ওই ব্যক্তিটিকে জিজ্ঞাসা করা হয়, কেন ওগুলোতে তিনি বিশ্বাস করেন না, তিনি হয়ত জবাবে বলবেন, ওগুলোতে বিশ্বাস করার মত যথেষ্ট তথ্য প্রমাণ পাওয়া যায় নি বলে। কিংবা হয়ত বলতে পারেন, এখন পর্যন্ত পরীক্ষা নিরীক্ষা করে ওগুলো সত্ত্বার বাস্তব অস্তিত্ব কেউ প্রমাণ করতে পারেন নি, তাই ওসবে বিশ্বাস করার প্রশ্ন ওঠে না। এটি পরিস্কার যে, এই বক্তব্য থেকে তার মনের সংশয় আর অবিশ্বাসের ছবিটিই আমাদের সামনে মূর্ত হয়ে ওঠে, বিশ্বাসপ্রবণতাটি নয়। ঈশ্বরে অবিশ্বাসের ব্যাপারটিও কিন্তু তেমনি। নাস্তিকেরা তাদের সংশয় আর অবিশ্বাস থেকেই 'নাস্তিক' হন, 'না-ঈশ্বরে' বিশ্বাস থেকে নয়। সে জন্যই মুক্ত-মনা Dan Barker, তার বিখ্যাত "Losing Faith in Faith: From Preacher to Atheist" গ্রন্থে পরিস্কার করেই বলেছেন - 'Basic atheism is not a belief. It is the lack of belief.' (পৃঃ ৯৯)। আসলে সত্যি বলতে কি, 'বিশ্বাস' ব্যাপারটিই দাড়িয়ে আছে একটি 'অপ-বিশ্বাসমূলক' প্রক্রিয়ার উপর। ডঃ হুমায়ুন আজাদ তাঁর একটি সাম্প্রতিক সাক্ষাৎকারে বলেছেন,

‘যে বিষয়ে আমরা নিশ্চিত নই, যার কোন অস্তিত্ব নেই, যা প্রমাণ করা যায় না, তাতে মানুষকে বিশ্বাস করতে হয়। মানুষ ভুতে বিশ্বাস করে, পরীতে বিশ্বাস করে বা ভগবানে,

ঈশ্বরে বা আল্লায় বিশ্বাস করে। এই বিশ্বাস সত্য নয়, এগুলোর কোন বাস্তব রূপ নেই। মানুষ বলে না, আমি গ্লাসে বিশ্বাস করি বা পানিতে বিশ্বাস করি, মেঘে বিশ্বাস করি। যেগুলো নেই সেগুলোই মানুষ বিশ্বাস করে। বিশ্বাস একটি অবিশ্বাসমূলক ক্রিয়া। যা সত্য, তাতে বিশ্বাস করতে হয় না; যা মিথ্যে তাতে বিশ্বাস করতে হয়। তাই মানুষের সব বিশ্বাস ভুল বা ভ্রান্ত, তা অপবিশ্বাস।’

নাস্তিকেরা সঙ্গত কারণেই এই সমস্ত প্রথাগত অপবিশ্বাসের বাইরে।

জনাব জওহের আরেকটি বিষয় ভুল ভাবে ব্যাখ্যা করেছেন। তিনি বলেছেন, ‘...নাস্তিক্যবাদীরা যদি অঙ্ক কষে প্রমাণ করে দিতে পারতেন যে ঈশ্বর নামক কোন সত্ত্বার অস্তিত্ব আদর্শেই নাই- তা হলে অন্য কথা ছিল। এস্থলে কেউ কেউ প্রশ্ন করতে পারেন - প্রমাণ করার দায়িত্ব কি নাস্তিকদের একার? আস্তিকরাই প্রমাণ করুক যে ঈশ্বর আছেন। সে ক্ষেত্রে আমার যুক্তি হল, হ্যাঁ প্রমাণ করার দায়িত্ব নাস্তিকদের একার। যুগে যুগে তাই হয়ে এসেছে।’

ধারণাটি ভুল, যুগে যুগে মোটেও তা হয়ে আসে নি। দর্শন শাস্ত্রে ‘Burden of Proof’ বলে একটি টার্ম প্রচলিত আছে যার মর্মার্থটি হল, যে কোন উটকো দাবীর যথার্থতা প্রমাণ করার দায়িত্ব দাবীদারের। আপনি যদি ঈশ্বরে বিশ্বাসী হন, পরীতে বিশ্বাসী হন, জ্বীনে বিশ্বাসী হন, পূর্ব জন্মে বিশ্বাসী হন, অ্যালিয়নে বিশ্বাসী হন - আপনাকেই এই সমস্ত বিষয়ের অস্তিত্বের যথার্থতা প্রমাণ করতে হবে; যারা এগুলোতে বিশ্বাস করে না, তাদের দায়িত্ব নয় ‘অঙ্ক কষে’ আপনার দাবীকে ভুল প্রমাণ করা কিংবা নস্যাৎ করা। যিনি ভুতে বিশ্বাস করেন অথচ ভুতের অস্তিত্বের প্রমাণ চাইলেই উলটে প্রতিপক্ষের কাঁধে দায়ভার চাপিয়ে দিয়ে বলেন, ‘প্রমাণ করুন তো, ভুত বলে কিছু নেই’ - তিনি আসলে নিজের অজান্তেই একটি যৌক্তিক ভ্রান্তিতে (logical fallacy) আচ্ছন্ন হয়ে পড়েন, দর্শনে যার একটি সম্ভ্রান্ত নাম আছে - ‘shifting the Burden of Proof’; সহজ বাংলায় যাকে বলে ‘উদোর পিন্ডি বুধোর ঘারে’ চাপানো। এই ভ্রান্তিটিকে দর্শন শাস্ত্রে এভাবে সংজ্ঞায়িত করা হয়েছে -

The burden of proof is always on the person asserting something. Shifting the burden of proof is the fallacy of putting the burden of proof on the person who denies or questions the assertion. The source of the fallacy is the assumption that something is true unless proven otherwise. (Ref: The Atheism Web, Logic & Fallacies)

বার্ট্রান্ড রাসেলকে একবার জিজ্ঞাসা করা হয়েছিল উনি ঈশ্বরের অনস্তিত্ব প্রমাণ করতে পারবেন কিনা। তার জবাবে উনি বলেছিলেন:

"If I were asked to prove that Zeus and Poseidon and Hera and the rest of the Olympians do not exist, I should be at a loss to find conclusive arguments "

জওহের সাহেব যে যুক্তিতে নাস্তিকদের উপর 'উদোর পিন্ডি' চাপিয়ে দিয়ে ঈশ্বরের অস্তিত্ব প্রমাণ করতে চেয়েছেন সে একই যুক্তিতে তাহলে জিউস, হেরা, ব্রহ্মা, কালী, খর, পশুপতি, অশ্বখামা, ট্যাশ গরু, রামগরুরের ছানা সবকিছুকেই 'বিনা প্রমাণে' মেনে নিতে হয়, কারণ কেউ এখন পর্যন্ত 'অঙ্ক কষে' এগুলো যে আদপেই নেই - তা প্রমাণ করতে পারে নি। অবশ্যই না করতে পারার সঙ্গত একটি কারণও আছে। কারণ, দর্শন শাস্ত্র আমাদের শিখিয়েছে যে, নেতিবাচক আস্তিত্বের প্রস্তাবনা (negative existential proposition) কখনই প্রমাণযোগ্য নয়। ব্যাপারটি ঈশ্বরের ক্ষেত্রেও সমানভাবে প্রযোজ্য।

জওহের সাহেব কোন ধরনের অংক কষে দেখালে ঈশ্বরের অনস্তিত্ব মেনে নেবেন তা অবশ্য তিনি পরিস্কার করেন নি। কিন্তু তিনি নিজেই আবার তাঁর প্রবন্ধে স্বীকার করে নিয়েছেন যে, আধুনিক কোয়ান্টাম পদার্থবিজ্ঞানের তত্ত্ব খুব ভালভাবে দেখিয়েছে যে, মহাবিশ্ব সৃষ্টি হতে পারে নিতান্তই প্রাকৃতিক নিয়মে- কোন পরম পুরুষের হাতের ছোঁয়া ছাড়াই, স্বতঃস্ফূর্তভাবে। এর পরও নাস্তিকদের কাঁধে দায়িত্ব থাকে কিভাবে? বরং আমার তো মনে হয় বল এখন রয়ে গেছে আস্তিকদের কোর্টে। ঈশ্বরের অস্তিত্ব প্রমাণ করতে হলে তাদেরই বরং আধুনিক বিজ্ঞানের তত্ত্বগুলোকে ভুল প্রমাণ করে বলতে হবে যে, না - এভাবে স্বতঃস্ফূর্ত ভাবে বিশ্বজগৎ কোনমতেই তৈরী হতে পারে না; ঈশ্বরের হাত লাগবেই। শুধুমাত্র আইনস্টাইনের একটি উদ্ধৃতি দিয়ে ব্যাপারটি এড়িয়ে গেলে চলবে না।

প্রসঙ্গতঃ বলে নেওয়া ভাল যে, সব কিছুর পেছনে সৃষ্টিকর্তা থাকতে হবে, কিংবা সব ঘটনার পেছনেই কারণ থাকতে হবে, এটি স্বতঃ সিদ্ধ বলে ভাবে নেওয়ার আসলেই কোন যৌক্তিক কারণ নেই। আকাশে যখন 'সন্ধ্যার মেঘমালা' খেলা করে, কিংবা পাহাড়ের ঢাল বেয়ে নেমে আসে সুচারু নঝার হিমশৈল, অথবা একপশলা বৃষ্টির পর পশ্চিম আকাশে উদয় হয় বর্ণিল রংধনুর, আমরা সত্যই মুগ্ধ হই, বিস্মিত হই। কিন্তু আমরা এও জানি এগুলো তৈরী হয়েছে স্রষ্টা ছাড়াই পদার্থবিজ্ঞানের কিছু সূত্রাবলী অনুসরণ করে। এছাড়া পদার্থবিজ্ঞান নিয়ে যারা গবেষণা করেন তারা সকলেই জানেন, রেডিও অ্যাকাটিভ ডিকের মাধ্যমে আলফা বিটা, গামা কনিকার উদ্ভব হয় প্রকৃতিতে কোন কারণ ছাড়াই, স্বতঃস্ফূর্তভাবে। এছাড়াও 'ভ্যাকুয়াম ফ্লাকচুয়েশন' এর ঘটনাও একটি কারণবিহীন ঘটনা বলে পদার্থবিজ্ঞানের জগতে অনেক আগে থেকেই স্বীকৃত।

অনেক বিজ্ঞানীই মনে করেন যে, ভ্যাকুয়াম ফ্লাকচুয়েশনের মাধ্যমে শূন্য থেকে স্বতস্ফূর্তভাবে বিশ্বজগৎ তৈরী হওয়া কোন অসম্ভব বা অলৌকিক ব্যাপার নয়। এবং এভাবে বিশ্বজগৎ তৈরী হলে তা পদার্থবিজ্ঞানের কোন সূত্রেই আসলে অস্বীকার করা হয় না। কোয়ান্টাম তত্ত্ব অনুসরণ করে শূন্য অবস্থা থেকে যে বিশ্বজগৎ তৈরী হতে পারে- এ ধারণাটি আসলে সর্বপ্রথম ব্যক্ত করেছিলেন নিউইয়র্ক সিটি ইউনিভার্সিটির এডয়ার্ড ট্রায়ন, ১৯৭৩ সালে। ১৯৮১ সালে মহাজাগতিক স্ফীতি তত্ত্বের (cosmic inflation) আবির্ভাবের পর থেকেই বহু তাত্ত্বিক পদার্থবিজ্ঞানী প্রাথমিক কোয়ান্টাম ফ্লাকচুয়েশনের মাধ্যমে মহাজাগতিক স্ফীতিকে সমন্বিত করে তাদের মডেল বা প্রতিরূপ নির্মাণ করেছেন। বহু বৈজ্ঞানিক জার্নালে সেগুলো প্রকাশিতও হয়েছে এবং এখনো হচ্ছে। উদাহরণ হিসেবে এখানে কিছু সাম্প্রতিক পেপারের উল্লেখ করা যেতে পারে :David Atkatz and Heinz Pagels, "Origin of universe as Quantum Tunneling effect" Physical review D25 (1982): 2065-73; S.W. Hawking and I.G.Moss "Supercolled Phase Transitions in the very early Universe", Physics letters B110(1982):35-38; Alexander Vilenkin, "Creation of Universe from Nothing" Physics letters 117B (1982) 25-28, Andre Linde, "Quantum creation of the inflammatory Universe," Letter Al Nuovo Cimento 39(1984): 401-405 ইত্যাদি। প্রাকৃতিক নিয়মে স্বতঃ স্ফূর্তভাবে শূন্য থেকে মহাবিশ্বের উদ্ভবের ধারণাটি যদি স্বেফ 'ননসেন্স'ই হত, তবে বৈজ্ঞানিক জার্নালগুলোতে এই ধারণার উপর আলোকপাত করা পেপারগুলো সাম্প্রতিক সময়ে কখনই প্রকাশিত হত না। এ বিষয়ে আলোকপাত করে আমি [‘আলো হাতে চলিয়াছে আঁধারের যাত্রী’ \(৭ম পর্ব\)](#) লিখেছি। বিদগ্ধ পাঠকেরা সেটি পড়ে দেখতে পারেন।

আরো কিছু অঙ্ক কষা যাক। অঙ্ক কষে ‘ঈশ্বর নেই’ এটা প্রমাণ করতে চাওয়ার আগে জেনে নেওয়া ভাল যে, ঈশ্বরের কোন যুক্তিগ্রাহ্য সংজ্ঞা বাজারে আছে কিনা। কবি সাহিত্যিক থেকে শুরু করে ভাবুক দার্শনিকটি পর্যন্ত যে যার মত ঈশ্বরকে সংজ্ঞায়িত করেন। কেউ প্রেমিকার চোখে, কেউ বা রাত্রির জ্যোৎস্নায়, কেউ কবিতায়, কেউবা গানে, কেউ সুরা-সাকীতে, কেউ জনসেবায়, কেউ প্রকৃতিতে কিংবা কেউবা আবার সচিন তেডুলেকরের ব্যটিং-এ ঈশ্বরকে খুঁজে পান। এধরনের অব্যক্ত মানবিক আবেগ, উপমা, মনের ভাবগত প্রতিরূপকে সঠিক বা ভুল প্রমাণ করার কিছু নেই, বিজ্ঞান ওসব নিয়ে কাজও করে না। বিজ্ঞানের প্রয়োগ নিঁখুত বাস্তবতায়। যে সমস্ত বিষয় সঠিকভাবে সংজ্ঞায়িত নয়, সে গুলো নিয়ে বিজ্ঞানের কোন মাথাব্যথা নেই। ঈশ্বরের সর্বজনগ্রাহ্য সংজ্ঞা খুঁজতে গিয়ে ধর্মগ্রন্থগুলোর দিকে তাকালেও দেখা যায় সেখানে স্ববিরোধিতার ছড়াছড়ি। যেমন বাইবেলের ধারণা অনুযায়ী ঈশ্বর অদৃশ্য (Col. 1:15, ITi 1:17, 6:16), এমন একটি সত্ত্বা যকে কখনও দেখা যায় নি (John 1:18, IJo 4:12)। অথচ বাইবেলেরই বেশ কিছু চরিত্র যেমন মুসা (Ex 33:11, 23), আব্রাহাম, জেকব (Ge. 12:7,26:2, Ex 6:3) ঈশ্বরকে দেখতে পেয়েছিলেন বলে বর্ণিত হয়েছে। ঈশ্বর পরিষ্কার করেই বাইবেলে বলেছেন - ‘you cannot see my face, for no one can see

me and live' (Ge 32:30) অথচ, জেবব ঈশ্বরকে জীবন্ত দেখেছেন (Ge 32:30)। এগুলো তো পরিষ্কার স্ব-বিরোধীতা। ঠিক একই কথা বলা যায় হজরত মুহম্মদের 'মিরাজে'র ক্ষেত্রেও। আরজ আলী মাতুব্বর তার 'সত্যের সন্ধান' গ্রন্থে লিখেছেন, 'এ কথায় প্রায় সকল ধর্মই একমত যে, 'সৃষ্টিকর্তা সর্বত্র বিরাজিত'। তাহাই যদি হয়, তবে তাঁহার সান্নিধ্যলাভের জন্য দূরে যাইতে হইবে কেন? আল্লাহতা'লা কি ঐ সময় হযরত (দ.) - এর অন্তরে বা তাঁহার গৃহে, মক্কা শহরে অথবা পৃথিবীতেই ছিলেন না? পবিত্র কোরানে আল্লাহ বলিয়াছেন - 'তোমরা যেখানে থাক, তিনি তোমাদের সঙ্গে সঙ্গে আছেন' (সুরা হাদিদ - ৪)। মেরাজ সত্য হইলে এই আয়াতের সহিত তাহার কোন সঙ্গতি থাকে কি?' আরও দেখা যায়, একটি ধর্মের ঈশ্বরের সাথে আরেকটি ধর্মের ঈশ্বরের বিস্তর ফারাক। এক ধর্মের ঈশ্বর কোরবানি করলে খুশি হন তো আরেক ধর্মের ঈশ্বর জীব হত্যাকে মহাপাপ মনে করেন। এক ধর্মের ঈশ্বরের কাছে মূর্তি পূজা বৈধ, আরেক ধর্মের ঈশ্বরের কাছে তা শিরকতুল্য অপরাধ। এক ধর্মের ঈশ্বরের কাছে শুয়োরের মাংস হারাম, আরেক ধর্মের ঈশ্বরের কাছে নয়। এক ধর্মের ঈশ্বরের কাছে গোহত্যা মহাপাপ হলেও, আরেক ধর্মের ঈশ্বরের কাছে তা উৎসব। এক ধর্মের ঈশ্বরের অনুসারীরা দাঁড়ি রাখায় পুণ্য খুঁজলে আরেক ধর্মের অনুসারীরা খোঁজেন টিকি রাখায়! ধর্মগ্রন্থগুলোর বাণীগুলোকে অশ্রান্ত ধরে ঈশ্বরের সার্বজনীন সংজ্ঞা খুঁজতে গেলে তো মাথার সমস্ত চুল পড়ে যাবার দশা হবে! তারপরও ধর্ম-দর্শন নির্বিশেষে যে বেশিষ্ট্যগুলো দিয়ে ঈশ্বরকে সচরাচর মহিমাম্বিত করা হয় সেগুলো সবই দেখা গেছে যুক্তির কঠিনপাথরে খুবই ভঙ্গুর। যেমন, ঈশ্বরকে বলা হয় 'পরম দয়াময়' (all-loving) এবং সর্ব শক্তিমান (all-powerful), নিখুঁত (perfect), সর্বজ্ঞ (omniscient) ইত্যাদি। কিন্তু ঈশ্বর যে পরম দয়াময় নন, তা বুঝতে রকেট সায়ন্টিস্ট হতে হয় না। আরজ আলী মাতুব্বর তার 'সত্যের সন্ধান' গ্রন্থে বলেছেন,

'কোন ব্যক্তি যদি একজন ক্ষুধার্তকে অন্নদান ও একজন পথিকের মাল লুণ্ঠন করে, একজন জলমগ্নকে উদ্ধার করে ও অন্য কাউকে হত্যা করে অথবা একজন গৃহহীনকে গৃহদান করে এবং অপরের গৃহ করে অগ্নিদাহ, তবে তাহাকে 'দয়াময়' বলা যায় কি? হয়ত তাহার উত্তর হইবে - 'না'। কিন্তু উক্তরূপ কার্যকলাপ সত্ত্বেও ঈশ্বর আখ্যায়িত আছেন 'দয়াময়' নামে। ... জীব জগতে খাদ্য-খাদক সম্পর্ক বিদ্যমান। যখন কোন সবল প্রাণী দুর্বল প্রাণীকে ধরিয়া ভক্ষণ করে, তখন ঈশ্বর খাদকের কাছে দয়াময় বটে, কিন্তু তখন কি তিনি খাদ্য-প্রাণীটির কাছেও দয়াময়? যখন একটি স্বর্প একটি ব্যা-কে ধরিয়া আস্তে আস্তে গিলিতে থাকে, তখন তিনি স্বর্পটির কাছে দয়াময় বটে। কিন্তু ব্যা-টির কাছে তিনি নির্দয় নহেন কি? পক্ষান্তরে তিনি যদি ব্যা-টির প্রতি সদয় হন, তবে সর্পটি অনাহারে মারা যায় না কি? ... কাহারো জীবন রক্ষা করা যদি দয়ার কাজ হয় এবং হত্যা করা হয় নির্দয়তার কাজ, তাহা হইলে খাদ্য-খাদকের ব্যাপারে ঈশ্বর সদয়ের চেয়ে নির্দয়ই বেশী। তবে কতগুন বেশী তাহা তিনি ভিন্ন অন্য কেউ জানে না, কেননা তিনি এক একটি জীবের জীবন রক্ষা করার উদ্দেশ্যে অসংখ্য জীবকে হত্যা করিয়া থাকেন। কে জানে একটি মানুষের জীবন রক্ষার জন্য তিনি কয়টি মাছ, মোরগ, ছাগল ইত্যাদি

হত্যা করেন?... কেহ কেহ মনে করেন ঈশ্বর সদয়ও নহেন এবং নির্দয়ও নহেন। তিনি নিরাকার নির্বিকার ও অনির্বচনীয় এক সত্তা। যদি তাহা নাই হয়, তবে পৃথিবীতে শিশুমৃত্যু, অপমৃত্যু, এবং ঝড়, বন্যা, মহামারী, ভূমিকম্প ইত্যাদি প্রাণহানিকর ঘটনাগুলির জন্য তিনিই কি দায়ী নহেন?’

আরজ আলীর প্রশ্নমালা মানব মনের অন্তহীন সংশয়বাদী চিন্তাকেই তুলে ধরেছে সার্থকভাবে। গ্রীক দার্শনিক এপিকিউরাস (৩৪১-২৭০ বিসি) সর্বপ্রথম the argument from evil এর সাহায্যে ‘ঈশ্বরের অস্তিত্বের’ অসারতা তুলে ধরেন :

ঈশ্বর কি অন্যায়-অবিচার-অরাজগতা নিরোধে ইচ্ছুক, কিন্তু অক্ষম?
তাহলে তিনি সর্বশক্তিমান নন।

তিনি কি সক্ষম, কিন্তু অনিচ্ছুক?
তাহলে তিনি পরম দয়াময় নন, বরং অপকারী সত্তা।

তিনি কি সক্ষম এবং ইচ্ছুক -দুটোই?
তাহলে অন্যায়-অবিচার-অরাজগতা পৃথিবীতে বিরাজ করে কিভাবে?

তিনি কি সক্ষমও নন, ইচ্ছুকও নন?
তাহলে কেন তাঁকে অযথা ‘ঈশ্বর’ নামে ডাকা?

অকাট্য এই যুক্তি। আরজ আলী তাঁর ‘সত্যের সন্ধান’ গ্রন্থে বিধাতার ‘সর্বশক্তিমানতা’র দাবী খন্ডন করে আরও লেখেন :

‘বলা হয় যে, আল্লাহর অনিচ্ছায় কোন ঘটনা ঘটে না। এমনকি গাছের পাতাও নড়ে না। বিশেষত তাঁহার অনিচ্ছায় যদি কোন ঘটনা ঘটিতে পারে তাহা হইলে তাঁহার ‘সর্বশক্তিমান’ নামের সার্থকতা কোথায়? আর যদি আল্লাহর ইচ্ছাতেই সকল ঘটনা ঘটে, তবে জীবের দোষ বা পাপ কি?’

প্রবীর ঘোষ তার ‘আমি কেন ঈশ্বরে বিশ্বাস করি না’ বইয়ে বলেন :

‘আল্লাহ ঈশ্বর সব কিছুর নিয়ন্তা। সর্বশক্তিমান। তাঁর ইচ্ছে ছাড়া গাছের পাতাটি নড়ে না, মানুষের নিঃশ্বাস পড়ে না। তিনি মানুষ সৃষ্টি করেছিলেন তাঁরই ভজনার জন্য। তাঁরই গুণ-কীর্তনের জন্য। তাহলে সমস্ত মানুষকে দিয়ে তাঁর গুণ-কীর্তন করাতে পারছেন না কেন? যুক্তিনিষ্ঠ মানুষগুলো ঈশ্বর, আল্লাহর গুণ-কীর্তন করা তো দূরের কথা, বরং অস্তিত্ব নিয়েই টানা হ্যাচড়া শুরু করেছে। ঈশ্বর এই সব যুক্তিবাদী মানুষদের কেন নিয়ন্ত্রণ করতে পারছেন না? কেন ওইসব বে-আককেলদের মুখ থেকে ঈশ্বর-আল্লাহর ভজনা

বের করতে পারছেন না? তবে কি যুক্তিবাদীদের নিয়ন্ত্রণ করার ক্ষমতা ঈশ্বরের নেই?
যুক্তিবাদীদের কাছে ঈশ্বরজাতীয়দের সব জারিজুরিই কি তবে ফক্বা?’

তারপরও ঈশ্বরকে সর্বশক্তিমান আর দয়াময় জ্ঞানে পূজো করা চলছেই। চলছে প্রার্থনাগীত, স্তব স্তোত্র, ঈশ্বর-বন্দনা, ঈশ্বর-মাহাত্ম্য। এ চলবেই। তা চলুক আপত্তি নেই। কিন্তু একটি আগাগোরা পরস্পরবিরোধী এবং অসংজ্ঞায়িত বিষয়কে গনিতের সাহায্যে ভুল প্রমাণের আহ্বান জানানোর আগে জওহের সাহেব আরেকটু ভাবলে বোধ হয় ভাল করতেন।

জনাব মেজবাহউদ্দিন জওহের জীবন-মৃত্যু, আত্মা, লাইফফোর্স ইত্যাদি বিষয়ের ভুল ভাবে অবতারণা করে ঈশ্বরের অস্তিত্বের সাফাই গেয়েছেন। বস্তুতঃ আত্মা এবং লাইফ ফোর্স-দুটোয় খুবই অবৈজ্ঞানিক টার্ম এবং বিজ্ঞান এগুলোর অস্তিত্বকে স্বীকার করার মত তথ্য প্রমাণ পায় নি। এগুলো আসলে মানুষের আদিম কল্পনা, অজস্র মিথের মতই কিছু মিথ। প্রবন্ধের আকারের কথা স্মরণ রেখে আমি এই মুহূর্তে এ বিষয়গুলো নিয়ে বিস্তারিত কিছু বলতে চাইছি না। পরবর্তীতে এ গুলো নিয়ে আরও বিস্তারিত ভাবে লিখবার আশা আছে। তবে জীবন-মৃত্যুর আধুনিক ধারণা সঙ্কলিত করে এবং আত্মার অস্তিত্ব ছাড়াই কিভাবে প্রাণকে ব্যাখ্যা করা যায় এ নিয়ে আমি মাস কয়েক আগে ‘প্রাণের প্রাণ জাগিছে তোমারি প্রাণে’ (১ম, ২য় এবং ৩য় পর্ব) একটি সিরিজ লিখেছিলাম মুক্ত-মনা আর ভিন্নমতে। আগ্রহী পাঠকেরা এটি আরেকবার পড়ে দেখতে পারেন। চতুর্থ পর্বটি এখনো সময়ভাবে লেখা হয়ে উঠেনি, তবে লেখার ইচ্ছা আছে ভবিষ্যতে। জওহের সাহেবের একটি উক্তি নিয়ে আমি এখানে কিছু কথা বলতে চাই। তিনি প্রাণের উদ্ভবের পেছনে ঈশ্বরের হাত থাকার প্রতি ইংগিত করে বলেছেন, ‘কিন্তু বিজ্ঞানের এই চরম উন্নতির যুগেও ল্যাবরেটরীতে এ্যামিনো এসিড ও প্রোটিন একত্রে মিশিয়ে একটি জীব কোষ তৈরী করা যায় নি। মানুষের জ্ঞান এমন পর্যায়ে পৌঁছেছে যে সে ক্লোন করে হুবহু আরেকটি মানুষ তৈরী করে দিতে পারে। অথচ অতি ক্ষুদ্র একটি জীবকোষ তৈরী করতে পারে না’। এই উক্তির মাধ্যমে জনাব জওহের সাহেব যেটি তুলে ধরেছেন তা হল বিজ্ঞানের সীমাবদ্ধতা। বিজ্ঞানের সীমাবদ্ধতা কোন ঈশ্বরের প্রমাণ নয়। তার আর্গুমেন্টটি এরকম :

* বিজ্ঞান এই মুহূর্তে ল্যাবরেটরীতে প্রাণের উদ্ভব ঘটাতে পরছে না

* অতএব প্রাণের উদ্ভবের পেছনে ঈশ্বরের একটা ভূমিকা আছে।

এটি খুবই ভুল যুক্তি। বিজ্ঞানের সীমাবদ্ধতা সব যুগেই ছিল, থাকবে। আবার অনেক সীমাবদ্ধতাই বিজ্ঞান অতিক্রম করে সামনের দিকে এগিয়েছে। বিজ্ঞান স্থির নয়, সতত

গতিশীল। এটা ঠিক প্রাণের উদ্ভবের পেছনে বিরাজমান সৃষ্টির আদি নিয়ামকগুলোর অনেক কিছুই এখনও অজানা, অনেক কিছুই এই মুহূর্তে ব্যাখ্যাশীল, কিন্তু তা বলে এ নয় যে তার পেছনে ঈশ্বর নামক কোন কাল্পনিক সত্ত্বাকে আমাদের মনে নিতে হবে। আজকের বিজ্ঞানীদের কাছে যা অজানা ভবিষ্যতের বিজ্ঞানীরা তার সমাধান নিয়ে আসবেন, এবং তা তারা সমাধান করবেন বিজ্ঞানকে ব্যবহার করেই। এভাবেই প্রতিনিয়ত আমাদের জ্ঞান এগুচ্ছে। অনেকেই এ ব্যাপারটি বুজতে চান না। যখনই কোন রহস্য সমাধান করতে তারা ব্যর্থ হন, এর পেছনে ঈশ্বরের ভূমিকাকে কল্পনা করে নেন। যখনই আমাদের জ্ঞান-বিজ্ঞানের মধ্যে কোন ফাঁক ফোকর দেখতে পান, এর ভিতরে ঈশ্বরকে গুজে দিয়ে এর একটা সহজ সমাধান দিতে সচেষ্ট হন। এধরনের আর্গুমেন্টকে দর্শনের পরিভাষায় বলে ‘God in gaps’। একটা সময় যখন বিজ্ঞান এতটা উন্নতির শিখরে ছিল না- আন্তিকেরা তাই যেখানে সেখানে ঈশ্বরকে আবিষ্কার করতেন, যেখানেই রহস্য দেখতেন, বিজ্ঞানের সীমাবদ্ধতা খুঁজে পেতেন, সেখানেই তারা ঈশ্বরকে আবিষ্কার করতেন। কিন্তু বিজ্ঞানের অগ্রগতির সাথে সাথে যতই ফাঁক ফোকর ভরাট হয়ে যাচ্ছে, ততই তাদের ঈশ্বর লজ্জিত হয়ে নিজের পরিসীমা ক্ষুদ্র থেকে ক্ষুদ্রতর করে ফেলছে। একটা সময় মানুষ আকাশে খোদার আরশ আর স্বর্গের জন্য আলাদা স্থান চিহ্নিত করেছিল। কথিত আছে রাবন নাকি এই পৃথিবী থেকে স্বর্গ পর্যন্ত সিঁড়ি বানানোরও পায়তারা করেছিলেন। তার মানে মানুষেরা মহাকাশে পৃথিবীর খুব কাছাকাছি জায়গাতেই স্বর্গ, নরক, খোদার আসনের কল্পনা করেছিল। কিন্তু টেলিস্কোপ যন্ত্রের আবিষ্কারের পর আর গ্যালিলিও নিউটনের অবদানের পরে আর আকাশে খোদার আরশ আর খুঁজে পাওয়া যায় না, খোদা এখন লুকিয়ে পড়েছে ‘বিজ্ঞানীরা কি ল্যাবরেটরীতে জীবকোষ তৈরী করতে পেরেছে’ অথবা ‘মানুষ কি মৃত্যুকে জয় করতে পেরেছে?’ অথবা ‘বিগ ব্যাঙের আগে কি ছিল বিজ্ঞান কি তা ব্যাখ্যা করতে পারে?’ - এধরনের কিছু আণ্ডবাক্যের ভিতরে। বিজ্ঞানীরা ল্যাবরেটরীর ফ্লাস্কে জীব কোষ তৈরী করতে না পারলেও ফ্লাস্কে কৃত্রিমভাবে আদিম পরিবেশের প্রতিক্রিয়া সৃষ্টি করে অনেক আগেই দেখিয়েছেন যে, এ পৃথিবীতেই আদিম অবস্থায় অজৈব পদার্থ হতে জীবনের উৎপত্তি হয়েছে এবং তা কোন রহস্যজনক কারণে নয়, বরং জানা কিছু রাসায়নিক প্রক্রিয়ার মাধ্যমে। নোবেল বিজয়ী রসায়নবিদ হ্যারলড সি ইউরে আর তার ছাত্র স্টেনলি এল মিলারের পরীক্ষাটি এক্ষেত্রে স্মার্তব্য। এভাবে তারা উচ্চ তাপে আর চাপে অজৈব পদার্থ থেকে এ্যামিনো এসিডের সন্ধান লাভ করেন যাকে জীবনের ভিত্তিমূল হিসেবে বিবেচনা করা হয়। এরপরেও বিজ্ঞানীরা এখনো এমন কোন জীবকোষ ল্যাবরেটরীতে তৈরী করতে পারেন নি যা ফ্লাস্কের গা বেয়ে নেমে এসে আমাদের চমকে দেবে। এর একটি প্রধান কারণ - ‘সময়’। জীবকোষ তৈরীর পেছনে পৃথিবীতে বিবর্তন প্রক্রিয়া চলেছে কোটি কোটি বছর ধরে। আর এই কোটি বছরে পৃথিবীর আবহাওয়াও বদলেছে বিস্তর। যেমন, আদিম পরিবেশে মুক্ত-অক্সিজেন ছিল না, অক্সিজেনহীন বিজারকীয় আবহাওয়া অক্সিজেনময় জারকীয় আবহমন্ডলে রূপান্তরিত হয় আজ থেকে দুই বিলিয়ন বছর আগে। আবার বর্তমান বিশ্বের বায়ুমন্ডলে আদিম পরিবেশের মত মিথেন ও এ্যামোনিয়া নেই, তার জায়গায় আছে জলীয় বাষ্প, কার্বন-ডাই-অক্সাইড,

আনবিক নাইট্রোজেন, হাইড্রোজেন ও প্রচুর আনবিক অক্সিজেন। এই কোটি বছরের সময়-প্রসার আবহমন্ডলের পরিবর্তনকে ল্যাবরেটরীর ফ্লাস্কে বেঁধে রাখা যায় না। ক্লোন করতে কোটি কোটি বছর অপেক্ষার ঝঙ্কি নেই বলে ক্লোন করা সম্ভব হয়েছে, কিন্তু প্রোটিনয়েড, কো-এসারভেট, নিউক্লিয়িক এসিড, নিউক্লিয়প্রোটিন গঠনের সময়সাপেক্ষ ধাপ পেরিয়ে আদিম জীবকোষ বা ইউবায়োট একারণেই এখনো তৈরী করা সম্ভব হয়নি। তবে একটা সময় আসবে যখন এ সমস্ত গুরুত্বপূর্ণ ফাঁক ফোকর বন্ধ হয়ে যাবে, তারপরও কিছু বিশ্বাসী মানুষ থাকবেনই যারা ফাঁক ফোকর খুজে প্রশ্ন ছুঁড়ে দেবেন : "Ah, but what about the mating ritual of the Venezuelan Accordion Beetle, eh? You can't explain that with your stupid test tubes, can you? Bow down and praise the Lord in apology!"

সকলের সুস্বাস্থ্য কামনা করছি।

বিঃ দ্রঃ আমার শেষ লেখাটির পর বেশ কিছু ভাল মন্তব্য পেয়েছি পাঠক পাঠিকাদের কাছ থেকে। জনাব শাহাদাত আমাকে একটি কবিতা পর্যন্ত উৎসর্গ করে ফেলেছেন। আমার মত অখ্যাত লেখকের কাছে এ এক পরম পাওয়া। নেদারল্যান্ড থেকে মিস তানবিরা তালুকদার আমার উদ্দেশ্যে মুক্তমনায় কিছু প্রশংসাবাক্য প্রেরণ করেছেন। সৈয়দ হাবিবুর রহমান আমার হয়ে কলম-যুদ্ধ লড়েছেন তার দাদুর কাহিনীতে। ব্যক্তিগতভাবে ধন্যবাদ দেওয়ার সৌজন্যটুকুও হয়ত আমি অনেককেই দেখাতে পারিনি। আমার লেখার অনুরাগী লেখক-লেখিকা ও পাঠক-পাঠিকাদের কাছে আমি আসলে অপরিশোধ্য ঋণে ঋণী।

অভিজিৎ

Email: avijit@mukto-mona.com

জুন ২৬, ২০০৪